

欽
定
全
唐
文

欽定全唐文卷八十八目錄

僖宗 三

委使臣徵訪兵術賢才詔

命相度河渠詔

求言詔

優卹扈駕兵士并訓飭神策諸軍詔

議鹽法錢法詔

答宰臣蕭遘等上尊號詔

允宰臣蕭遘等上尊號詔

立壽王傑爲皇太弟知軍國事詔

遺詔

戒約新及第進士宴遊勅

宣撫東都官吏勅

停福建觀察使李播等任勅

遣使宣慰蘄黃等州勅

賜亳州太清宮勅

封丈人山爲希夷公勅

釐革選人勅

誅蕭遘等勅

賜潘稠勅

冊尊號德音

欽定全唐文卷八十八

僖宗 三

委使臣徵訪兵術賢才詔

朕每念艱難之本思拯濟之圖理少亂多古猶今也蓋搜揚之未至非爵賞之不行況自鄉里沽名物情賈怨朝市有爭先之黨山林多獨往之人彼豈自窮而莫知返其有文苞經緯道貫儒元貞遁自肥浮名不染豈無加等之命以待非常之流今委使臣遠近徵訪必行備禮以聳羣方且幾貴研深用惟體要運當無事固垂拱而可持時屬多

虞非拔奇而不振或有材優將略業洞兵鈴辨勝負於風雲計長短於主客妙得神傳之決恥成兒戲之名不俟臨機方期制變或銷聲於屠釣或屈志於風塵勿媿自媒當期致用至乃旁規國病動適時宜深探貨殖之源備得富強之術排於浮議鬱彼良圖又有志擅縱橫久潛緇褐材雖超異見辱儕流苟全一藝之工不必萬夫之敵亦有推研厯象按步星辰言必效於機先術豈疑於億中是資奇器孰曰異端亦在勸來佇加殊賞噫功名可慕少壯幾何在君親則忠孝相資念國家則安危同切勿甘流落猶徇

宴安並委使臣榜示訪求長吏津置發遣同心體國無使淹延懸賞俟能必期升擢朕雖鍾艱否亦謂憂勤高祖太宗之在天固當垂祐社稷生靈之有主夫豈乏賢達我敷求咨爾將命勿孤翹矚苟自因循其間儒學優游軍謀宏遠密陳時務願應制科者已從別勅處分跼蹐遺才沈淪末位不礙文武並須升聞布告天下咸使知悉

命相度河渠詔

食乃人天農惟國本兵荒益久漕輓不通關中鄭白兩渠古今同利四萬頃沃饒之業億兆人衣食之源比者權豪

競相占奪堰高磴下足明棄水之由稻浸稔澆乃見侵田之害今因流散尚可經營宜委京兆尹選強幹僚屬巡行鄉里逐便相度兼利公私或署職特置使名假之權寵或力田遞升科級許免征徭因務勸分冀能兼蓄亦宜速具聞奏

求言詔

古者進善翹旌蔽賢削地苟異至公之選適開浮黨之門要在拔奇方資濟理昔貞觀戡亂旣久理具畢張而馬周徒步獻書上猶前席魏徵直言替否下得竭誠況朕久致

履危實惟懜道欲新庶政益賴羣才已詔中外臣僚必使
搜羅淹滯仍令文武各陳所見冀有可裨苟申籌國之謀
是濟同舟之患非無上賞佇稱勤求布告遠近咸使知悉

優卹扈駕兵士并訓飭神策諸軍詔

政在有經動惟可久事能師古安則易持今者初復舊京
須申定制大漢之術兼王霸先儒之權有弛張重舉綱條
且務輯睦未遑改作尤貴適時夫萬乘抗威四方從令雖
資強幹是切安人迎駕諸軍都士等扈從經年鄉關積念
永言忠力合假恩優節級議功爵秩無恡其情願住京邑

者便充填兩軍欲歸本道者即仰所司各與公牒到本道
後遞加糧賜別立名額給復終身如諸都中人數稍多優
賞未徧即令所司計其積欠指揮某郡某縣或各逐將校
任去處上供財賦令自差人請領神策軍自經亂離久未
訓整孤兒漸散壯騎多亡羽林之垂象空存天陣而疾雷
不震雖言無戰豈忘有虞宜委中書門下與本軍商量案
舊籍裁減冗數惟務撫實仍令三司資助各修營壘貴使
繕完又金吾諸衛等城禁日嚴徼巡務切須令集事不可
闕人亦宜條錄修補

議鹽法錢法詔

近京贍國之資權鹽爲本法禁久廢姦蠹實繁陷誤藩方
依憑城社須知根柢乃可改張委本司選周術通財庶期
革弊其江淮食貨利害亦須詳究指揮沿路占留遣使親
諭兵革之後銅鉛至多折納鑄錢尚資興利亦要議其可
否不令旁撓農商

答宰臣蕭邁等上尊號詔

朕猥以寡德丕承耿光宵旰雖勤干戈繼作困生靈於豺
豕委宮闕於榛蕪罪已則深噬臍何及尚賴天地悔禍祖

宗降靈內之則公卿大臣外之則方伯元老上憑眷祐下
憫蒸黎允叶一心克濟四海靖妖氛於寓縣剋戎壘於郊
圻雖復舊都匪遑高枕於戲大恥才雪羣生未蘇文武典
章墜無半在威權法制行亦幾何土疆徒繫於地官征賦
罕歸於國帑肅恭常祀尤在正辭昭格上元寧容溢美卿
等同匡艱運當識深衷加以虛名斯爲不急步驟錙銖之
際自有至公照臨明晦之間寧資外獎當勤納誨宜斷來
章

允宰臣蕭邁等上尊號詔

朕以寡昧嗣守丕圖思臻太和不敵寧處干戈載戢稼穡
少登禮樂中興聲教遂被是用郊上元以報本解密網以
緩刑豈非九廟降靈羣賢叶力共贊薄德致茲小康永惟
眇躬實懼虛飾卿等上稽天意下採人謠旁訪典謨仰奉
明訓以爲天地之道既不讓於強名皇王之心宜屈已而
從物累貢殷勤至於再四雖鑿井耕田未及勲華之理而
樂推欣服難違億兆之情旣徇衆詞疑終溢美勉俞來請
深用愧懷

立壽王傑爲皇太弟知軍國事詔

門下朕幼荷丕構夙夜不遑蓋以三百年之鴻基十七聖
之大業守文重事偃武貞期惟懼冲人不克負荷果致干
戈四處寇盜連年再省藩維兩違陵廟上媿高祖太宗之
締構下慙中外羣后之匡扶既積殷憂俄成疾疹而上天
降祐中道獲痊萬乘還宮六龍挽駕御端門而肆赦閱諸
夏而駿奔雖有愧中興而克全舊物繫爾中外方事報功
寧期瘥疾未瘳尚嬰沈痼徒思勿藥詎報有徵腠理是加
連綿莫療永惟八方之大萬務之殷既不躬親固當擁滯
朕親弟壽王傑天資永悟生稟溫文孝友通於神明仁愛

格於上下必能體我憂惕濟我艱難用叶和平得就頤養
宜冊爲皇太弟知軍國政事咨爾內外大臣羣方庶尹悉
宜聽監國處分盡心輔戴寧國安人酌變從宜同底於理
布告天下咸使聞知

遺詔

門下朕以冲眇祗荷鴻基每惟祖宗之締構艱難念中外
之始終匡輔常同馭朽豈忘納隍而乃重去廟朝兩違陵
寢始則黃巢犯闕後則朱玫干天險阻道塗蒼黃播越唯
思罪己但念勞人宗社降靈妖氛尋盪六龍回轡萬乘還

官方將陳玉帛以充庭會蠻夷而向闕寧期殷憂成疹宵
旰奪神走羣望而靡徵希勿藥而罔效臣僚愛我攻療無
遺曾未小瘳以至大漸於戲修短定分古今常期著在格
言斯爲達理是用降茲訓誓祇聽朕言皇太弟知軍國事
敏聽政明敏孝友天資聰明神助龍顏表異日角標奇居
大麓而風雨不迷輔中興而山河備厯寬宏及物清明在
躬必能保守宗祧奉承天地內撫百姓外鎮四夷實億兆
之念同固威靈而是屬付託無恨予復何憂宜令所司備
禮於柩前即皇帝位仍以太保兼侍郎韋昭度攝冢宰軍

國事重不可暫闕以日易月抑惟舊章皇帝三日而聽政
十三日小祥二十五日大祥二十七日釋服天下節度觀
察防禦等使及監軍諸州刺史職守非輕並不得離任赴
哀應天下人吏百姓告哀後出臨三日皆釋服無禁婚嫁
祠祀飲酒食肉釋服之後無禁舉樂文武官朝晡臨時十
五舉音宮中當臨者非時不得擅哭五坊鷹犬除備蒐狩
外餘並解放醫官及伎術人等晝夜勞苦知無不爲宜各
安存勿或加罪噫朕念兵革以來耕農久廢尤傷畿甸莫
不流亡豈堪復土之規獨昧弔人之旨且累朝遺制畢及

山陵以漢文薄葬之詞爲列聖循常之命約錦繡金銀之飾禁奢華雕麗之工皆例作空文而並違先旨今者流離若是痛毒堪悲仗百姓即百姓一空捐國用則國用無取不可踵從前之計度因此日之生靈俾朕厚顏下見先帝應緣山陵事務宜令中外商量比從來每事十分各減六七桐棺瓦器朕所慕之況在今晨勿欺大夜咨爾股肱重臣内外文武爪牙之士腹心之徒合志同心輔予令弟布告天下咸使聞知

戒約新及第進士宴遊勅

進士策名向來所重由此從官第一出身誠宜行止端莊
宴遊儉約事務率醵動合兢修保他日之令名成在此之
愼靜豈宜縱逸唯切追歡近年以來澆風大扇一春所費
萬餘貫錢況在麻衣從何而出力足者樂於書罰家貧者
苦於成名將革弊訛實在中道宜令禮部切加戒約每年
有名宴會一春罰錢及鋪地等相許每人不得一百千其
勾當分手不得過五十人其開試開宴並須在四月內稍
有違越必舉朝章仍委御史臺當加糾察

宣撫東都官吏勅

勅東都留守王渢河南尹劉允章及分司御史官僚皇城
將吏府縣官僧道耆壽百姓等朕端居上京默念東洛常
恐宗廟不得嚴肅宮闕或至蕭條省寺荒涼井廩凋耗府
縣有疲羸之苦郊原貽蝗旱之災雖鑿輅翠華未期巡幸
而臨軒負展常注憂勤昨者草寇憑陵王師討伐勤勞車
甲綿厯星霜巡環於十二郡間塗炭於數千里內方聞翦
滅又致猖狂王仙芝等縱脅生靈聯攻縣邑纔收陽翟又
破郡城不日復陷汝州兼擄郡守監軍使凶黨旣盛人心
易搖尋聞洛邑震驚都城紛擾舊相護几筵迴避羣官挈

妻子奔逃工商失業以無依黎庶捨家而竟出朕每聞奏
報彌切驚憂心如納隍手若馭索便罷重陽內宴以示焦
怛之懷而宗社降靈神祇助順尋聞寇盜不敢侵踰吹燎
火以南旋却洪波於北注今則官兵漸集王室頓安公卿
可以還舊居閭巷足得復生業況聞秋田大稔物價稍低
雖蹙履於艱危必終成於康濟今差左諫議大夫楊授工
部員外郎李巢專往宣慰凡居長吏官僚等切在條理安
存必令減節征徭均平賦稅無使虐吏重困疲人諸道師
徒多已屯集累勅有司官吏不令供餽闕遺亦委使臣勞

諭將卒專俟凱旋之日當行慶賜之恩

停福建觀察使李播等任勅

福建觀察使李播荊州刺史楊權古蔚州刺史王龜範壁
州刺史張贄濮州刺史韋浦施州刺史婁傳會邢州刺史
王回撫州刺史崔理黃州刺史計信卿等刺史親人之官
苟不諳詳豈宜除授比爲朕養百姓非獨榮爾一身每念
疲羸實所傷歎李播等九人授官之時衆詞不可王回等
三人到郡無政惟務貪求實汚方州並宜停任

遣使宣慰蘄黃等州勅

君后惻隱之心必先於濟物朝廷發生之澤本務於弔人
納隍雖軫於四維滅燎尚延於數月朕每念愁毒良增震
嗟王仙芝尚君長等跡自椎埋結成嘯聚呼澤而豺狼相
應掠地而雞犬無遺是以所寇州城便爲荆棘黔首盡逃
於山谷遺骸欲遍於邱墟皆由時平不務於講兵歲久遂
至於忘戰以至望風喪敗迎刃殲夷縣道皆空人靈胥怨
嘆凶徒之未服念赤子之無辜蓋朕誠信未能感昭慰曉
莫能通達須漸資於完復俾稍慰於流離爰命腹心往詢
疾苦今故遣國子司業李夷遇將我惠渥卹彼荒殘拯塗

炭之沈淪解瘡痍之呻痛應汝隨申安蘄黃等州凡經王
仙芝尚君長所攻劫處悉加撫育遍問存亡其有已歸復
人戶仰所在州縣各酌量遭罹重輕減放租稅其今年并
至來年春季內所有差役並宜放免其田苗如經軍馬踐
踏兼人戶有戰陣死亡者全與放免其有衣冠士族經亂
兵橫罹殺戮者仰於屬省錢內量給衣衾槨殯速與葬送
并爲設祭慰其營魂衆暴骨遺骸委在城郭郊野無親故
收認者宜作大塚以瘞之將校常主牙旗新曾加戰折股
斷臂解脛陷胷進不念身誓思報國亡歿者當與褒贈見

在者終身不停衣糧仍令本州縣官吏闕遇難不撓臨危
向公枉陷兵鋒合嘉名節仰所在錄名奏聞當與追贈其
有道路郵館之所傳遞警急之時或驛吏驚奔賊徒焚爇
仰宣慰使量所在物力重爲經營冀備追風免妨乘駟其
衣冠將吏軍人百姓遭焚劫甚者委州縣審細檢勘以義
倉斛斗賑救且令粗濟饑危所在府庫囤倉亦有不經劫
盜或恐奸吏乾沒隱欺切仰勘驗虛實分析申奏其有留
州留使錢物皆是十月已前秋賦之初須仗循良漸自收
歛節其橫費酌彼軍須講於耕戰之餘用濟公私之急其

須添器械更峻城隍猶防烏合之徒重有鯨衝之勢推我
隱憂之意俾觀急病之能況十室之中必有忠信數郡之
內漸復人煙所宜互佩韋弦重張琴瑟全由良吏善撫疲
人應有緩急之閒便宜所切州縣之利病奏請之未行仰
宣慰使與所在刺史縣令細詳事由逐件聞奏兼期知我
萬機之重俟黎元而共安九重之深願風俗而常泰委是
將命以布朕心

賜亳州太清宮勅

亳州太清宮是混元降聖之地名高道祖福蔭皇基九龍

之瑞井涵空一塵之仙蹤在木累代之祺祥可紀近年之
感應尤彰所宜嚴盛於福庭安可荒涼於淨宇潘稠能施
善政久染真風廣出俸錢備修宮觀垣墻棟桷無不精新
像設丹青彌加煥麗觀圖考事深可慰嘉其住官威儀道
士吳重元可賜紫仍號凝元先生道士馬含彰孫棲梧並
賜紫潘稠加金紫光祿大夫檢校工部尚書餘如故

封丈人山爲希夷公勅

元氣斯剖維山結成孕雲雨於林巒乃神仙之窟宅丈人
即天關紫府鎮於蜀郡青城方象外之崑邱狀海邊之蓬

島南巡鶴廟軒皇與元祖俱來少駐鑾車展敬則封崇宜
及俾使琅函署德常傳萬歲之聲玉檢銘功速建太平之
業其山宜封希夷公仍令本州刺史親備香齋冀申虔祝
供奉官袁易簡刺史王茲縣令崔正規等入山致醮行禮

釐革選人勅

朝廷懸爵賞之科設掄才之政言其藻鑒在乎清通況當
求理之時方切任賢之術將宣至化實賴平衡宜於取捨
之間必叶公忠之論如聞羈縻旅食貧苦選人守數考而
方及選期望一官而時希寸祿注唱纔畢旋又更移多被

逗遛莫遂便穩脂膏之地須因有賄而昇遷避之官即是
孤寒所受言斯猥弊乃積歲年縱有條流尋亦隳改況今
行在宜溥渥恩不欲使歎惋栖遲吁嗟屈滯歸乎允當倚
在有司宜令中書門下切在條流如選人實有考課堪理
繁劇者臨時注擬可以甄昇繫生民之慘舒任銓衡之推
擇勿令留滯切速指揮仍將朕意宣示百寮及吏部三銓
并選人等各令知悉

誅蕭邁等勅

逆賊僞宰相蕭邁鄭昌圖裴徹皆代荷國恩身極人爵或

兩府鈞衡之任或六官兵賦之權所宜罄竭丹誠祗膺茂寵而遽乖臣節輒肆逆謀挾扶疏屬之人遂成篡奪驅脅端良之士大恣猖狂扇惑藩方馳書邊徼妄徵故事欲動人情並居僞廷同干相位事主之道何以爲心賴遠近輸誠祖宗垂祐忠臣發憤妖孽就誅今則興復有期廟朝重正顧惟涼德益所兢慙然則刑賞之科所以示天下而申懲勸也其於用舍朕不敢私撫事論事難逃極典宜令所在集衆斬訖聞奏宣示天下宜體朕懷

賜潘稠勅

移縣就宮必多穢瀆縣依舊所宜準萬年例昇爲赤縣仍
降青詞修齋告盟

冊尊號德音

天地運無私之道以遂羣生帝王宏在宥之仁是章含垢
得不廣沾沛澤昭洽寰區爰施解網之恩用忻垂衣之化
朕君臨大寶子育含靈前歲中外臣僚藩方將帥獻我徽
號詢於典章雖云前赦不遙旣受鴻名咸施慶澤稟列聖
之法嗣致兆人之勸康然以赦宥恐頻變通宜審權停舊
典再及新春每念貶降遐荒遷流裔土傾心望闕延頸祈

哀繫於朕懷常深惻憫宜順陽和之候追行盪滌之恩自
乾符四年正月五日已前京畿及天下州府大辟罪已下
見禁囚徒各委長吏遞減二等限五日決遣唯十惡五逆
故殺人及官典犯入已贓持刀行劫合造毒藥不在此限
於戲朕居億兆之上於今四年業業兢兢如履冰馭朽苟
有闕教道何致時雍未嘗不更自勞心尤思致理況允契
羣臣之望欽承列聖之規特降鴻恩獲遵彝典今則已覃
惠澤俾洽生成復遇陽春同均煦育宣布中外深體朕懷

欽定全唐文卷八十九目錄

僖宗

四

車駕還京師德音

冊王景崇常山郡王文

南郊赦文

祭丈人山文

靈寶道場設周天醮詞

欽定全唐文卷八十九

僖宗

四

車駕還京師德音

朕聞天以陽居大夏地以陰居元冬是明任德而不任刑
也在帝舜則舉兩階之干羽在成湯則開三面之網羅是
明好生而不好殺也朕以眇身嗣膺大寶垂三百年之宗
社奉十七聖之威靈夕惕朝乾不忘寤寐豈謂釁生於地
謫見於天霾塵暴起於兩京蛇豕交橫於四野宗廟乏饗
干戈日尋蓋獲戾於上元俾流災於下土前歲才歸大國

又及播遷信由倚任之非良有愧精誠之未至貶衣損食
庶塞乎愆違履薄臨深每增於戰懼方修郊廟且復京畿
而駐驛才安還宮可俟虔誠罔通於穹昊兵革又起於藩
維蓋以朕不敏不明君臨兆庶仁不能叶生成之旨義不
能符斷割之幾智無周物之明信寡應時之用陷蒸黎於
塗炭致王室之險艱綿厯歲時於茲八稔顧茲頽紊職朕
之由且朕深宮九重跬步千里目雖視而不見耳雖聽而
不聞罪在朕躬痛入骨髓但仰天而投泣恨無地以容身
撫几興言何嗟及矣今則敬行避殿減膳徹縣食無海陸

之珍耳絕管絃之樂唯加惕勵冀遂感通將宏及物之恩
在布惟新之令應天下見禁囚徒除十惡忤逆官典犯賊
持仗劫殺合造毒藥開發墳墓其餘罪輕重遞減一等左
降官各與詳所犯量移如已經兩度量移者宜並放還仍
仰所在州府限德音到日準勅處分訖分析聞奏左降官
及流人身有死者并許歸葬其鳳翔府所管吏軍百姓等
切令招葺務令歸安縱與李昌符關連情非巨蠹及父兄
在隴州城內事出脅從者一切不問其隴州城內軍吏百
姓不得輒令損傷戴禮之文務先掩骼應有未葬骸骨及

橫尸在路委所在長吏速與收斂藏瘞其自兵荒以來殺傷之處委所在州縣以孟冬賞死事之日於北郭除地用鷄豚設祭所貴以導和氣且慰幽魂前年冬未出京之時如聞文武朝臣愴惶奔竄或因凍餒或遭鋒刃遂致斃踣深可憫傷自累年來朝臣有因謫宦遂致殞身或制使遽聞枉橫宜令中書門下尋訪各與贈官孝弟承家忠貞奉國旣顯揚名之道宜加布澤之榮應内外文武臣及諸道節度觀察防禦使隨駕諸軍頭亡父母并準舊例各與追贈追封如有母親見存者各與進封左右神策及隨駕諸

部兵士等荷戈負弩侍衛勤勞旣效節以輸誠實竭忠而排難永言勲績宜有甄酬其隨駕諸都頭宜各與勲爵未
有功臣名號具將士次第填補不得虛被衣賜有紊典章
如覆視不實節度使奏取進止本判官重加貶責其邊地
沃壤極多歲收可望如聞耕牛素少戍卒苟安唯長蒿萊
俱乏衣食委節度使良田之處更議添人均配膏腴令其
耕種制置利便務令酌中其南山及平夏党項盡是百姓
須令保安長吏若能撫綏蕃人自然寧息切不得妄有侵
擾致其怨嗟常須使商旅往來部落不得阻塞致理必先

於尚儉傷風莫甚於窮奢朕苑囿不修珠玉不寶所思敦
素每務去華如聞卿大夫庶士近者競崇侈靡莫辨等威
服翫車輿皆越制度蠹於教化朕甚憫焉卿大夫當助我
紀綱爲人表則宜修儉約以變囂風其京師應有奢僭違
令式者聞之當行朝典應諸道申奏有草賊州縣本皆齊
人迫於凍餒召聚徒侶遂肆猖狂並仰所在長吏明加曉
諭有能自新首罪一切不問如稔惡不悛事狀難恕委所
在長吏設法擒捕不得漏網上京諸司及天下州府負犯
逃走罪人今春已降德音除本罪合至死者從咸通五年

以前並停追捕歸還故土其數至多慮被奸人遞相恐動
悉委所在告諭令其樂業無致驚惶如歸復者惡跡貫盈
不能改過更有違犯尋勘不虛便仰併舉前愆一時痛斷
不得容隱侵害良善江淮商賈業在舟船如聞近日官中
擄借甚苦或傾奪以充運米或題關以備載軍非理滯留
散失財貨州縣雖云和雇商人焉敢請錢本求錐刀翻成
損折縱有冤屈豈能申論道路怨嗟莫甚於此自今以後
委所在長吏切加禁斷其所合供過軍等舟船唯許空載
航船便給見錢雇召如見裝貨物者切不得強令騰倒其

州縣所合雇船脚多無本色錢物皆是率配疲人起今以後并仰以上供錢充給如有茶鹽舟船關係三司權課者任準元勅處分自蠻寇侵擾連歲用兵耗蠹生靈海運爲甚驅我赤子深入滄波覩駭浪而魂飛汎洪濤而心死繼有覆溺多不上聞仍遣賠填急於風火哀其已死之衆不可復追念茲將斃之徒用延餘息應江淮四道運糧所有沈覆米損船綱官所由船戶及元發州縣合賠填者並從放免更不得校料追徵應闕海運留繫勘者并一時釋放唯造船官吏須有勘覆者不在此限近日蟲蝗米穀翔貴

所在州府須使通流況閉糴之條著在格令近關州府通
舟船處不得約勒商人固違勅旨等候江淮錢物到各宜
優賞以身許國致命捐軀慮茲盡瘁之誠宜飾始終之典
應自兵興以來所在都頭大將身歿王事未經贈官者仰
本道各與分析聞奏量功勞優與贈官如有子孫仰本道
各與補職務令存濟行營將士如身歿王事者其衣糧并
仰給與兄弟男姪如有父母無給養者切在安存勿令凍
餒雖累有處分可一切施行或有義士忠臣圖功立事力
當國難身歿賊鋒者宜委中書門下優與贈官兼訪子孫

俾沾祿仕用伸激勸冀洽恩榮扈從之勞辛勤備履若無
升進何以獎酬其到興元宮文武官等宜令優與遷改如
已經獎擢者特與量加階爵自貞觀開元之後建中元和
以來翊戴皇家扶持宗社勲績已銘於鼎彝謀猷實在於
冊書如聞子孫或多凌替贈太師汾陽王子儀臨淮王光
弼西平王李晟咸寧王渾瑊贈太尉秀實顏真卿顏杲卿
以下子孫宜各與一子九品正員官其子孫有才術可稱
委中書門下量才敘用以勸勲賢律有驅率之科所宜原
宥人無險詖之路固可矜寬其陷僞庭官寮多因迫脅旋

宜敎用勿使棲遲左右神策軍及沿邊諸鎮將士或隄防
藩窹或控扼封陞戴甲荷戈眠沙臥磧無抱子弄孫之樂
有離鄉去里之嗟自亂離以來衣糧多闕顧茲疲弊深軫
朕懷蓋緣諸道賦稅未來致使如此宜委度支戶部及鹽
鐵使各委官吏催促江淮及三川上供錢物充給兩軍及
邊鎮將士衣賜如催勘有序其官吏各與優獎如全無次
第必議懲責於戲朕以寡昧託億兆之上不能克相上帝
寵綏四方履地戴天痛心疾首是在股肱叶力藩翰同心
保列聖之洪基佐沖人之薄德共成興運以副殷憂爲政

之方實資共理且一邑之政由乎令長一郡之政由乎牧
守一方之政由乎藩翰之臣夫政修於上則化行於下可
以安人理國可以阜俗康時此古今之通理也自乾符之
後廣明以前節制廉問之臣州牧縣宰之吏或掄擬不當
或銓擇非良鎮藩翰者則惠養撫綏之術蔑聞居牧宰者
則貪慝苛虐之風益甚或淫刑濫殺或剝衣及膚失業亡
家父南子北多使饑者不得食寒者不得衣奔竄道途踰
藏山谷耕桑甚廢旱沴相仍結爲仇讎聚爲盜賊冤憤之
氣上達於九天激怒之威橫行於千里虔劉郡邑屠戮生

靈懷逆節者得以逞其凶桀恣爲暴擾蘊忠誠者雖欲平其禍亂益費機謀既往難追將來可保切在遞加激諭漸致和平倘或刺史知惠養之方縣令有撫綏之術公清克己廉慎當官績效彰聞當與遷擢如或貪殘不理害我疲人委中書門下重加懲殿仍令諸道長吏觀察判官切加察訪每歲具善惡奏聞自屬兵戈全妨耕稼遂令墾畝盡變汙萊蓋以殺傷之餘流亡益甚宜加招撫漸復農桑如有刺史縣令招收戶口開墾荒田置買耕牛修置農具者委所在觀察使精加點勘具數聞奏當據課效高低優加

升獎朕端拱穆清思宏理道用憂勤而補過守慈儉以律
身上展孝思下康庶務其於祀事尤在精崇常憂多難以
來有乖敬慎至於牲幣之數醯醢之宜必盡吉蠲或免簡
易宜委所司切加鈐轄不得因循夫儉者德之恭侈者惡
之大唐堯土階三尺夏禹菲食卑宮先聖遺風後王軌範
其有司合進常膳三分宜減一分六宮嬪御見在者人數
不多此外不令更有添置或有因緣寇盜流落外方宜委
所在長吏便與嫁遣任自營生不用送到駕前冀免虛有
勞費自此諸道更不用進聲樂及女弟子歌舞衣服綺繒

組繡雕鏤珠璣頗害女工實妨農事奇技淫巧往哲所譏
況遇艱難尤宜儉素其諸道不得進奉紋繡宮錦雕鏤輕
靡彰施之物五坊鷹犬以備時蒐方當勤恤之時寧有畋
遊之樂其鷹犬并令解放不用更置諸道亦不須進送艱
難已久增修未知展瑞披圖良多內愧且以爲白鳥丹鵲
不如孝子忠臣甘露醴泉未若風調雨順自今以後諸道
所有祥瑞並不要圖畫及進輔成教化實在賢良用副旁
求必資博採宜令文武常參官舉刺史縣令有異政殊績
者淪滯山林有奇文異行者所期表異無或面欺孝子順

孫義夫節婦各加旌表以示鄉閭父老有年九十以上者
賜帛二匹粟五石仍令所在以上供物支付瘡聾跛躄鰥
寡孤獨者委所在切加存恤無使恓惶名山大川興雲致
雨冀保順成之歲宜申望祀之儀太清宮及驪山華岳南
山廣惠公巖谷湫鳳翔啟聖宮邠州要冊湫宜各差官禱
謝其諸道應有祠廟標於祀典及先聖靈跡各委長吏差
官精誠啟告凡關百姓安危風土利病俾其蘇息切在撫
綏譌弊旣多固難徧舉仰所在長吏審詳利害一一條奏
所冀凋殘漸成完輯勿辜委過副我憂勤於戲朕爲人君

父累屬亂離一發言未嘗不兢憂一舉足未嘗不愧悼徒思罪已安敢尤人中外臣寮宜悉朕意

冊王景崇常山郡王文

維乾符五年歲次戊戌十二月壬戌朔三日甲子皇帝若曰朕聞尚德尊賢九命有專征之寄論功誥道四履標列國之榮賸惟碩臣統茲巨屏茂勲克樹殊寵未爰增䟽土之恩式表類能之重成德軍節度使鎮冀深趙等州觀察處置等使開府儀同三司檢校太尉兼中書令鎮州大都督府長史上柱國趙國公食邑三千戶食實封二百戶

襲實封一百戶王景崇德星垂耀嵩嶽降神抱匡君濟俗
之宏才蘊武庫文房之重器智逾災輟利比決雲運協祥
符懷茂先之博識道高時傑同季野之陽秋臨戎克布其
恩威命代榮彰乎經濟惟乃祖禰名光簡書正氣沖霄忠
誠貫日永言勲績著美華夷承家得馭衆之方共理契無
爲之化成吾心膺藉乃棟梁加以政洽兵農惠分黎庶俾
貔貅之衆敬若神明襁褓之徒愛如父母況位升台鼎績
著翰垣華資復異於陳蕃顯秩尤光於朱寵更舉封齊之
典冀同繼越之尊於戲啟金滕於周公翦桐圭於康叔皆

昭彰前史蔚著殊庸況今榮耀八紘富居千乘式茲優異
尚此渥恩往惟欽哉敬服厥命今遣使給事中柳韜副使
吏部郎中趙祕持節冊爾爲常山郡王

南郊赦文

元化序時日月啟貞明之照神功宰物乾坤垂覆燾之仁
萬物仰而遂生百王體以爲用朕虔膺眚命恭守丕圖懼
忝所承慮違厥道每馭朽以思戒若涉川而靡寧自臨御
以來夙宵增勵幸而文修政簡歲稔人安賞罰惟公忠厚
成俗道漸臻於清淨理將致於雍熙由是禮上帝用答天

休御端門以崇皇極是彰報本式叶體元尚念蠹於政事
者未除害於時宜者未革盡施條制以絕根源更表申恩
仍行肆眚昔殷湯解網實謂至仁漢文措刑永稱聖理在
宥乃爲君之德好生實有國之規今復承以陽春之時布
其渙汗之典上符天意旁契人心大禮備陳彝章克舉謀
猷廣備聲教遐宣期昭泰於寰區亦涵濡於動植溥天率
土既樂元風四海九州宜覃慶澤可大赦天下自乾符二
年正月七日昧爽以前大辟罪以下罪無輕重已發覺未
發覺已結正未結正繫囚見徒常赦所不原者咸赦除之

惟犯十惡叛逆以上及故殺人官典犯入已贓兼情涉巨
蠹及持仗行劫并故殺人者雖已傷未死更生意欲殺傷
偶時死者并同已殺人法處分買賣毒藥開劫墳墓及刑
獄之內官吏用情推勘不平因成冤濫無問有贓並不在
原免之限敦本睦親古今典制永惟負荷常切憂兢應宗
室有材行可外淪落在外並委宗正卿專加察訪旋申尚
書門下量材處分惠安皇太后凡有總麻已上親各委所
在搜訪聞奏仰酬顧復何擇親疎爰念播遷重命牽復至
於殂謝亦使惠綏用表深仁以彰元化左降官量移近處

已經移者更與量移如官至刺史準刺史月限例處分諸
色官未復資者有司別條流聞奏如合復資者五品已上
中書門下便與處分六品已下任依常例選集丁憂去任
及在憂制貶官者服闋日亦與量移緣責除降資正員官
及緣累停免未經引用者并量與進改流人及降死從流
者移近地如已收敘者量材錄用並僧尼道士移隸者亦
放還勸善懲違朝廷大典苟或隳紊何以聳人其流貶人
中或有情狀巨蠹物議不容者不在該恩流貶人如已亡
歿家口欲還及須歸葬者聽隨所便如緣葬事幼弱饑寒

不能自濟者委所在長吏量給棺槨優恤發遣左降官及
流人等有官者如已歿各還本官亡官失爵痕累禁錮者
並從洗滌諸色流貶人元勅內云雖逢恩赦不在量移之
限有自前年十月十二日赦書後已經量移者五千里更
與量移一千里三千里外與量移五百里情狀難容者不
在此限天德五城流人負罪素重元勅未經十載不得放
還今屬洪恩須令沾及宜減三年如年已滿便放還從九
月四日降郊禮勅後流貶及引決妄稱冤人等并重推覆
囚徒并不在此限近日奸險之徒多造無名文狀或張懸

文榜或譔造童謠此爲弊源合處極法應捉獲此色者準
持仗劫人合造毒藥例經赦不原其所得文狀準律文於
所在焚毀不得徵逋賊以利疲人是叶政經期爲理本京
兆府去年夏青苗錢每貫放三百文所放錢如有司占
留色目委戶部準舊例據數支填其咸通十一年以前百
姓積欠兩稅斛斗及青苗榷酒錢并稅草職田糠麴麩棘
等徵收不得空繁簿書前年十一月十二日赦令已蠲放
至今尚未了絕宜令所司速具放免錢物數目分析奏聞
如在官典所由腹內者不在此限從咸通十三年夏以前

京兆府所欠諸陵園及諸軍諸使錢草斛斗并諸雜物一物以上宜並放免其諸縣所欠府司錢草斛斗一物以上亦並放免從咸通十三年夏以前京兆府所欠諸陵掌閑驍騎丁資三衛等資錢亦並放免旬內逃亡人戶尚徵稅物切要條流以安疲瘵委京兆府差官逐縣勘覆其逃亡人戶產業田地未有人承佃者其隨田地苗稅除陌榷酒錢及斛斗等並權放三年勒常切招召人戶三年後再差官勘覆據歸復續却收稅從咸通十三年以前旬內所欠延資庫戶部度支榷酒除陌及和糴賑貸錢物斛斗一物

以上並宜放免內莊宅使巡官及人戶等應欠大中十三年以前至咸通八年以前諸色錢六萬二千三百八十貫三百文斛一十萬三千七十四石九斗絲二十二萬七千五百八兩麻二千四百七十觔草二十六萬五千八百五十五束念其累歲不稔人戶貧窮徒有鞭笞終難徵納並宜放免三司所欠錢物已遣不徵必慮依違尚猶追擾度支戶部鹽鐵三司應收管在城及諸州府諸場監院所欠咸通十年以前諸色錢物斛斗等前年十月十二日敕文并令放免所司不得更生節目妄有進取如聞所司官吏

緣循至今尚有盤勘都非公事但務生情歲月轉深奸弊頗甚各委本司差定官一人專勾當但據現在文帳檢勘除官典所由請領官錢和糴和市及在場官供官招商所由帳內正身見在外其身已亡歿曾經檢責及身見在貧窮家業蕩盡無可徵納者并逃竄捕捉未獲囚繫妻男攤徵保人等仰便據年額請免除去簿書不得更行文牒妄有盤問赦書下後限一箇月內具放免錢物單數分析聞奏如更稽遲本勾當郎官當議貶黜典吏等痛加懲斷停解天下州縣官銓司注擬便是選自朝廷何故三司監院

官索州縣承迎云是制院恐嚇州縣影占富豪從今後有
監院處亦仰州縣常加聽察如監院官有不公不進各申
本州行牒本司便如狀事稍重仰專差使送申狀本司事
大則任聞奏兼申中書門下御史臺以憑推勘所冀遞相
檢察不敢侵凌諸司更換素有定規近日苟且緣循漸至
虛折商徒則獲利倍於往日所司則侵損轉難任持若不
條疏積成蠹弊其三司更換宜令準咸通十五年閏四月
二十一日度支所奏處分如尚踵前必舉朝典制置新歲
酒錢其戶貧破者州縣不令破戶或賣柴傭力以納稅令

所由司條流聞奏其河南府界蒿荒地委河南尹於稅錢三分內量與免二分勿令無路營生聚爲草賊其天下州縣除已準元勅徵收兩稅榷酒錢茶鹽利旨支米價等分外餘額外加徵別配及販柴炭之人納稅等元無勅文緣本道奏請降勅并仰勅內便皆停罷仍限勅到後二十日內分析聞奏并不罪今日已前之事如又不已必舉明刑曾經水旱已放徵科或慮緣循須更提舉諸道州府或有遭水旱甚處去年夏稅合納苗稅等錢委本州府長吏酌量蠲放其咸通十年以前所欠負兩稅錢米等在百姓腹

內徵收不上者前年十一月十二日赦書已放免仍委州府速檢勘蠲放分析聞奏所在州縣除前資寄住實是衣冠之外便各將攝官文牒及軍職賂遺全免科差多是豪富之家致苦貧下準會昌中勅家有進士及第方免差役其餘只庇一身就中江南富人多一武官便庇一戶致使貧者轉更流亡從今後並依百姓一例差遣仍委方鎮各下諸州準此檢點江淮運米本實關中只緣徐州用軍發遣全無次第運腳價妄被占射本色米空存簿書遂使倉廩漸虛支備有闕緣循弛慢全自職司宜令轉運使速具

條流分析聞奏纔及春緩便須差清強官吏節級催驅嚴立科條須及舊額苟或踵前容易必舉朝章郵傳供須遞馬數目素有定制合守前規河南館驛錢物至多本來別庫收貯近日被府司奏請袞同支用遂使遞馬欠闕料糧不充憲司又但務緣循都不提舉宜令東臺館驛使速具條流分析聞奏東都留守所管兵數不少無非市肆之人緩急抽差全不堪用防衛官闕尤非所宜須有條流以革前弊宜令速分析見在闕額并老弱人數聞奏應緣州府經費悉有舊規近者不務在公惟思潤己或聯遇豐稔亦

不貢羨餘若小有水旱即競有論請致朝廷事力轉困在
臣下誠敬何乖自今以後如輒將上供一錢物支用者并
當加譴責不在原貸之限如本道實有災荒積歉爲甚衆
所知者不在限例朝廷徵發兵士固非獲已道途頓遞費
勞至多又聞節級須得人事裨補每縣不下五千文盡配
疲人深可哀憫自今後但供備無關輒不得踵前率配如
或違犯縣令本曹官重加貶降人吏決杖配流其都知兵
馬使以下並以枉法贓論立法之始當在必行諸處本置
作坊只合制造干戈兵甲及進獻供須昨徐方用軍諸道

多無兵器內庫般送填塞道途如聞作坊惟使雜伎弓甲之匠十無一人打築卽惟務精新器甲則愍忘修整自節察至刺史皆爲信臣不能委曲條流各宜自知改革諸道兵士非惟闕額不堪兼又軍將數多一員敵官健數分又占官健當直遣納課錢其弊數重深要除蕩仰諸道各自檢點如或本自書題又無功效非軍中子弟空請職名并皆䟽理其軍將等各遣納課錢者並準入己贓結罪科斷東畿之內留守影占最多稍富者不揀城外村中盡有一虛名文牒亦犯罪者亦稱此名府縣若追但行牒却取事

小則推勘了牒送事重者則與勒停委留切不得遮奪免致鬪傷其在京諸司亦仰各依此例如被抑屈但具奏聞且徵兩稅自有常期苟或先自催驅必致齊人凋弊蓋緣機織未畢庫錢未終便須零賣縑繒賤糶斛斗致使豪首迫蹙富戶吞侵須更申明俾其通濟諸州府如有不依旨限先期徵稅者長吏聽奏進止縣令錄事參軍並停見任書下考不在矜恕之限關要之外聲教至遙每念疲人尤多橫役訪聞五嶺諸郡修補廨舍城池材石人工並配百姓至於糧用皆自齎持既不折稅錢又全無優恤永言凋

察實可憫傷自此委節度觀察使接借本錢并刺史百計
收拾運轉別立修造案名額遣幹濟官主持常令急遂修
營勿遣大段摧毀永放百姓額外差科已責卹人斯爲盛
美遐荒賤吏尤可哀矜先於咸通五年梧州糴十萬石米
停貯數載之後方令盤送邕交如聞卑濕損傷雀鼠耗折
計其所言六萬石餘累載以來亦頗校料徵納主持軍將
十餘輩攤保累數百家或科決不輕或資財蕩盡典男鬻
女力竭計窮盡虛挂簿書徒爲羈繫宜從寬宥用釋人憂
其所欠米委度支一時放免邕管交趾屯駐兵士全無運

糧俾其足食湖南江西管內諸郡出米至多豐熟之時價亦極賤綱官若得錢收糴每斗必有盈餘道途既可經營輸納自無敗闕緣於官倉領米刮鐵平量既潤資陪便致吞侵耗折所以經年累月舳艫相交江路多有沈淪軍食常憂欠闕自今仰所在長吏切須饒潤綱官並令交付腳錢仍與善價糴買嚴示刑賞不使稽遲邕州安南晏州見屯諸道行營兵士合食米錢等三處兵數近四萬日食錢米費用極多全在諸道州使巡院饋運相繼免失支持近日以南中爲警急抽差皆務循將相同常事蓋緣地遠差

綱無利皆託以鹽鐵戶部指揮未得分明申報逗遛圖延
界分或有未有本色皆云額望收錢及綱官進發之時欠
腳錢途路侵盜錢米所至稽停每發一綱便逾星歲致令
供軍使頻申三處月限不相接續所司前後申奏行牒督
責非不丁寧蓋緣只有科貶之名曾無必行之令遂致全
無凜懼但務緣循若不嚴立科條必恐轉成敗失其諸道
州使巡場監院所合般送南中供軍錢米各委所在長吏
併發綱船以濟軍用仍委逐道節度觀察防禦經略刺史
差最大判官一人專判校料其巡場監院官場官自專催

促各令設法勾當克濟軍需如依前逗遛不早送申遂使
邊軍糧儲久闕供奉不得相續便據所欠錢米處勘還重
加貶責如州使官吏巡場監院官能罄誠節慎選行綱支
遣及至舟船繼至即重議酬獎河東向管延資庫斛斗五
十萬石每歲出陳入新之際勞擾州縣百姓至多未有用
時積爲深弊宜令本道節度使檢點除道路與邊鎮接近
緩急堪般充軍糧者即且準前其餘深僻州縣并遠條流
分析聞奏義倉斛斗本防災年所貯積歲多翻成侵害又
差重丁大戶充倉督子弟主管凡節察及監軍使刺史縣

令到任仍須一一毫量差役鄉夫數重勞擾每一量覆欠折轉多主掌之人貼家竭產生靈塗炭州縣困窮從今後宜五年一度變換便糶貨收錢入冬却糶仍委本道監使常加訪察如有上下蒙蔽欺隱破除聞奏但不要初上之日須重覆量每度擾人朝廷大弊在於令不行只如經水旱州三降勅命不許將逃亡規攤見在人戶遭災水旱處有於見在戶兩倍徵或至三倍又近年以來節度觀察使或初到任或欲除移是正二月百姓饑餓之時公遣二日條先抽徵見錢每一千文令納三四百此時無不兩倍三

倍生生舉債至典賣男女以充納官行彼貪心殘我赤子
從今後有如此者必舉極法以謝生靈諸道事例差使結
懽法信出於官中答幣歸於私室駐留供備迎送優豐進
獻不副常程結好却爲公事惟奏欠闕不思本源且隣境
結懽何必事須厚幣來者若爲私物去者何必官錢道慕
空門名爲釋子若非精進何以住持應城及諸州府僧尼
元勅人數外不得轉令私度如有死亡等闕即任據人數
填補年終聞奏待五年限滿時每收補皆須選擇有戒行
事業者勿令濫雜之輩於此容身天下刑獄申到法寺及

刑部有經數年不得了絕省寺人吏競邀賂出入律文大理寺及刑部官僚不親公事致使一案之內半死獄中從今後委中書門下每日點檢如停滯者大則貶降小則勒停其刑部郎中員外切須選擇亦不得輒冀奉使以望賄財有文案則併送對廳行貨財則獨收私第準咸通十一年條流諸州刺史三千里外限三十箇月二千里外限二十七箇月近者勒刺史到郡交代則可以計到郡月滿便且除移如新除者則須待月限滿除替其餘內外諸官並依咸通十一年條流如有限未滿錯替者任經中書門下

過狀便與追勅有過失須替則不在此限兩省官本令先
任四赤令貴欲知人疾苦近者纔三五月則替何殊罔生
空倍擾人從今後宜以十五日爲限兩畿令府判司從前
吏部注擬頃年或除三人兩人近者乃至除望縣令及部
尉等中書自不存體百司何以仰瞻其進馬千牛本限五
年方滿近者旋替年深致使入仕多門三銓無關從今後
如或用年深闕補人兵部郎官必議貶降詞科出身士林
所重本貴踐歷漸至顯榮近者惟扇澆風皆務躁進麻衣
纔脫結綬王畿是能十年宦途今來半歲遷授頗爲譎弊

須舉重明自今以後進士及第並須滿二周年後諸道藩鎮及戶部度支鹽鐵及在京諸司方得奏請如未及奏官限內有攝職處一任隨牒攝其宏文館集賢院奏請直館校理並依此月限如出身後諸道奏已請初銜未得兩考者輒便奏畿內尉充在職兩考方得依資除官改轉其授使下官先自有月限資序一一須守舊規不得超越比擬準咸通十四年十月九日勅文處分關節取受本身值財素來貧無亦多舉債祇緣從來赦文未甚分明賞罰若行必當止絕自今以後如有人錢買官納銀求職敗露之後

言告之初取與同罪卜射無捨其錢物等并令沒官送御史臺以贓罰收管如是波斯番人錢亦準此處分其櫃坊人戶明知事情不來陳告所有物業並不納官嚴加懲斷決流邊遠庶絕此類用其清平樂官乞託本自人情既越舊規過於債負雖累有明勅尚不遵行兩巡不切追擒教場又不鈐轄從來上於方鎮近日方鎮與樂官人事轉多別有遷除例皆乞覓喧呼門戶擁塞階庭以此得官人不願除授自今以後除方鎮外兩巡使及諸司外巡切加擒捉如有此色具送本司枷禁勘責痛加懲斷以絕此風近

歲以來風俗奢侈不營根本各務誇張及第登科傾資靖

產屋

闕一

竟踰於制度喪葬皆越於禮儀爲冊使弔贈之

臣或爭財貨乞賜章服之類不畏慚羞致使兒童或輕朝
列念茲靡愧常行歎嗟委中書門下次第條流稍爲改革
輸其常賦尚慮不充更或加徵其何以濟近年百姓流散
稅錢已多如聞自朝廷用軍有終百姓正稅外每貫紐四
十五十文已是數年至今不矜放黎甿冤抑腿脊瘡疾所
徵錢則將充諸色支分所添兵則逐月銷減每思此事深
可嘆傷其天下緣用軍奏加紐貫之外更有敢徵一文其

長吏及判官錄事參軍並準入已贓仍不在以官贖之限其鄭州庚道尉在任日加徵稅錢如或却徵亦依此例衡鏡之司去留雖切念其羈寓須與商量吏部選人如聞累年駁放至多或文狀粟錯或書判差遲有司守文不得不爾況選人例迫饑寒遠來調集頻年被駁情實可矜旣遇鴻恩合與優假委吏部檢勘去冬選人若有此色除非身名渝濫及欠選欠考外並以此遠殘闕取其情願者特與却收注擬諸道奏官奏者緣要關舊人不理從今後並須分明具不理罪愆先加懲責有罪空替則是惠姦其奏前

資及見任多有虛豎頭銜用錢計會從今以後有官更奏者便仰兼遞告身進奏院以憑點檢如告身不到不在奏行其虛銜所奏只與九品初任仍奏狀內須是三代官諱及鄉貫戶頭年幾餘各依資奏請河北三道不在此限守土長人切資士族品流混雜必害生靈刺史縣令如是本州百姓及商人等準元勅不令任當處官不繫高下蓋以事體不可兼又十室九親多有憎愛一切阻礙公事難行近年此色至多各仰本道遞相檢察當日勒停百姓商人亦不合爲本縣鎮將若有違越必舉典刑裨補除任實在

獎勞奏請繁多則爲過濫咸通七年赦書條流諸州府奏
軍將官不許除上佐如有功須獎即於本管內除授仍不
得占優厚處近日諸道不守條章或分兩三度奏來所貴
前後不相見但行會計貴得人多從今以後諸道軍將官
並限七月表到京令之初行宜武臣之敘進據所合奏人
數一表令如有別勞效者即待明年七月不得兩度貴行
欺隱忠在社稷誓著山河或盟府書勲或闕宮配食宜舉
賞延之典式彰義烈之名故尚父汾陽王贈太師晟贈太
尉秀實贈司徒顏杲卿太師眞卿張巡許遠南霽雲子孫

中未甄獎者每家與一人正員官安金藏頃申忠節實異
等倫合爲疇庸以勸義士如有子孫與一人正員官武德
以來配享功臣名迹尤著節義顯聞子孫凌替官闕廢墜
未經甄錄者委中書門下搜訪嗣人量加優獎慶連宗室
義重維城洎文武羣僚恪恭事務用酬勞績宜降恩私亞
獻撫王紘榮王愐等各賜物一百匹夾侍正衣進珪捧珪
各賜物五十匹亞獻終獻正衣各賜物四十匹大長公主
嗣王郡主縣主各賜物内外文武見任及致仕官三品已
上賜爵一級四品已下加一階合入三品五品欠考未合

敘者待考足日聽敘封孔聖之後加虞賓之恩式表崇儒以明繼絕文宣王後及二王三恪各與一子官其祠廟委所司量加修飭義在奉親道惟睦族將申孝敬合示恩榮皇五等已上親三品已上賜爵一級五品已上加一階六品已下及前資常選散官簡選日優與處分未有出身陪位者準會昌五年正月三日敕書處分應陪位皇五等已上親三品已上賜爵一級四品已下加一階四等親並諸色陪位者五品已上加一階六品已下各白衣并賜勲兩轉其前資及後出身各減一選皆懷追養之願盡有榮終

之心授任封崇式光存歿常參官及諸州府長官父母見在未有追封者并量與五品致仕官及階并邑號如有官者量與進改如官已至五品已上者即與五品階父母亡歿未經追贈者量與追贈及邑號任榮輔相寄重藩方洎於親軍咸秉忠節俾令追贈以顯榮名中書門下及節度使帶平章事各與一子八品正員官祖父母父母亡歿各與追贈已經追贈者更與追贈節度使與一子正員九品官東都留守度支鹽鐵使觀察處置都團練防禦經略招討使皇城留守各與一子出身先亡歿未追贈者各與追

贈虔奉典章肅供祀事宜覃渥澤以獎勞能禮儀使大禮使京兆府尹各與一子正員九品官應郊廟升壇行事官溥恩外中書門下尚書省御史臺三品已上特加一級四品已下各加一階如入三品者量減三考入四品者量減三考入五品者量減兩考仍待考足日聽敘其合選人與減一選內行事者官三品已上賜爵一級四品已下更加一階內侍省及內坊官四品已上各賜勲五轉五品已下各賜勲三轉應從駕至郊廟者溥恩之外三品已上賜爵一級四品已下各加一階白衣賜勲兩轉位列牙爪職掌

警衛念其宣力宜加疇勞

闕

祭丈人山文

維中和元年歲次辛丑七月丁未朔十八日甲子皇帝遣
將仕郎內侍省內府局令員外置同正員上柱國賜紫金
魚袋袁易簡賜紫道士杜光庭等備香火之奠封丈人山
爲希夷公惟山高極太清下蟠厚地含雪霜於陰谷吐日
月於陽崖助銅柱以標雄齊玉壘而增固本大末小諒千
載而不傾布澤施雲實萬物而斯植雖郡祠豐潔山廟肅
清未聞崇建之名徒有丈人之說朕以黃巢干紀翠輦蒙

金史卷之五
卷之五
三
塵火未滅於燎原書每煩於揮羽竊思冥助冀仗靈功俾
資千仞之崇式示三公之秩況希夷懿號蘋藻佳羞齋誠
宣室之中虔祝雲衢之外陰兵俟役孽豎期消重新日月
之光再奉宗祧之祀別申明命永鎮坤維尚饗

靈寶道場設周天醮詞

嗣皇帝臣某以流星譎見分野慮災謹遣賜紫道士杜光
庭等於宗元觀修靈寶道場丈人觀設周天大醮伏以至
道無形時符於人事元天垂戒必見於星文非憑悔謝之
門豈格修禳之念是用齋心宣室稽首名山爲百姓希恩

設周天大醮臣自塵驚關輔駕出襄梁九廟靡依羣生失
庇致祖宗之大業危若綴旒念士庶之求生勢同累卵省
過敢忘於罪己恤人深切於救焚布服蔬食贖愆尤於旣
往祈天悔過希保助於將來大道以慈惠爲基高明以廣
大爲本降福必歸於有德除災當務於庇人使沴氣潛消
飛星暗逝蜀郡士庶永絕於札瘥京國黔黎早離於霾曠
誓將仁育以答元功仰望靈恩不任懇悃之至